

嚴東有詩集

歸求草堂詩集卷四

江寧 嚴長明 用晦

丙子

登觀象台作

攜得驚人句來登北極峯九州初放眼七宿本羅胸靈憲

金繩閱奎章石室封

上有  
仁皇帝御書碑額

有懷千氣象西日

漫高春

昆明湖晚泛

秋色滿湖汀波光小洞庭遠涵千頃白高倚萬重青擊楫  
憑空闊吹簫卽杳冥不須悲夜寂中有大魚聽

得友人蜀中消息

幸有音書在迢迢達故山巴江三月雨  
熨道幾人還紫日增新成青衣護上關  
大刀環不得嗟爾鬢毛斑

卞忠貞公墓前有石柱一文云晉尙書令假節領軍將軍贈侍中驃騎將軍成陽卞公墓康熙中園父治地治城所得字跡瓌瑋鉅書深刻予欲仿歐陽文忠湖州石記之例斷爲顏魯公書並邀同人作詩以寶之

荒塗亘長籬斷闕直廣路一弔何氏園再拜卞公墓日月慨遞遷樵蘇禁已除金椎痛昔曾華表禕今露皓質貞不磨大例顯堪据秩先典午加晉制侍中親於尙書令驃騎貞墓啟謂九等之蹟密平原署名色正芒復寒森然啟遐慕渥闕於晉典非也

公生天寶末何異晉南渡姦騎恫中朝毒亂感外廷萬死

一身兼鐘簴幸如故千慮枉其材三州極所駐魯公乞御書天下放

生池碑額表云去年冬任并州刺史事在肅宗三年本傳僅載蒲饒二州刺史國家可惜人曠世

同一顧雪涕向高邱崢嶸寫平素而我惜公書顛沛偕所

遇窮碑壯三山風引浩無處公書舊在金陵者有顏氏大宗暨顏府君放生池三碑今

並佚懿此久沈埋精爽特完聚片石終古寒貞心兩朝寓欲

仿歐文忠決錄湖州柱滌之忠孝泉蔭以丹青樹作配忠

簡文卓立永無斲宋胡銓卞忠烈公廟碑今在祠內

登瓜州大觀樓眺矚

危樓江上鬱嵯峨有客褰裳俛逝波浪擁蕪城春色靜山

連京口夕陽多茫茫遠岫窗中列葉葉輕帆枕上過對此

已教愁騁望滄洲明發更何如

丁丑

題漢江歸棹圖

玉笛高樓夜有聲天涯歸思滿江城帆開湏口青山出秋  
入晴川綠樹平鳥鵲南飛孤月皎大江東去晚潮生山川  
如此容清歎底事難爲故國情

坐武氏園亭懷玉溪

病中風雨客懷加鏡檻頻來坐日斜翠竹自舒煙外籜粉  
蓮愁謝鏡中花清尊牢落風懷渺碧簟淒涼夢境遐莫道  
相離今咫尺錦屏風外足天涯

題顧星橋月滿樓卽次元韻

花間簾幙竹間樓片影西南遠挂愁幾度帶風還帶露才  
看如鏡又如鉤吳吟低付桐絲潤楚夢涼生薤葉秋何日  
香溪清影裏共憑高檻數沙鷗

懋句容崇明禪寺

攬轡赴原谷百里皆平蕪驅車向長郭轉見青蓮居悠然  
發清興杖策來精廬煙芳澹無極空翠佳有餘開軒一長  
望山氣澄空虛滄然赴秋澗白雲間與俱緬彼中林子曠  
歲懷清娛何當稅塵鞅雲臥依前除翛然棄才世繕性當  
何如

舟赴梁溪

陂塘散朝煙輕暉照柔櫓伊軋塞城隈漸轉西林浦水木

交澄鮮煙波對客與坐久寒潮生推篷搆新覩鱗鱗波外  
山澹澹煙中樹鳬鷺散不喧村墟聚堪數繫纜復前溪羈  
心共誰語

黃埠舟中題王蘭泉三泖漁莊圖卽用卷中浚叔子  
詩韻

前峯月未升平林霧先積曠望青蒼間中有暗潮白潏潏  
漲橫陂溶溶秀中澤問訊知泖涇伊人此焉宅願長涵幽  
悰滄洲事遊逸終宵飲湖光終歲飽山色芳心水似空清  
夢雲還碧何因夾宅居攜手同所適日掬水波當塵懷此  
應息

宿微泉閣遲趙映川

夕陽度西軒煙際數峯暝返景入滄江深沈颯餘映竹霧  
隱清光松風蒼苔佳聽虛室臥脩寥吟牀拂深淨卻憶蘇門  
生張琴散高詠感此坐中宵孤筇伫蘿逕

### 懷蘭泉

苦憶分襟日徘徊夜色中秋風異鄉別明月兩心同關埃  
愁先阻煙波信未通空依高閣裏一一數歸鴻

### 夕次橫林示諸景筠

炊煙前路起迢遞眇橫林榆柳村邊合人家水面陰稻梁  
分戶熟機杼映門深他日吾將隱桃源好共尋

### 蘭陵旅次通簡白門親故

江鄉歸思渺天涯煙樵迢迢入望遐兩岸夕陽明水寺一



川芳草暗漁家心憐出浦雙帆急目斷橫天一雁斜爲問  
同遊何日遂蚤傳芳訊到蒹葭

秋日舟中臥病作

秋來何處不堪傷江路維舟況越鄉長笛一聲天在水蒹  
葭千頃露爲霜愁懷漸覺生衣緩病骨先支八月涼欲向  
青山問消息幾時移病到煙莊

青州莊常州  
張氏名園也

題鈕昭服牧村圖

小塘十畝煙水間青村窈窕當其間板橋流水絕行跡  
蘆深隱何蕭然先生逸才世不數清標令譽殊高騫興酣  
落筆美無價會須揚藻翔天垣胡爲幽棲類窮士漁莊蟹  
舍相沿綠君言牧村有佳趣大湖五瀉當門前曲梁遠隔

蝦菜市連汀近接鳬鷺川煙林一徑入蒙密楊絲踈地花  
連天三株兩株屋頭樹十棱五棱溪南田樵兄漁弟便遊  
逸往來西陌連東阡此間嘯傲樂莫樂武陵何必尋桃源  
茲圖張示亦何意俾我昔夢難安便我家舊住淮水曲西  
溪點綴誇幽妍自從放跡入塵世揚州一夢留三年佳山  
佳水坐辜負漸看青鬢成華顛名園自古難獨樂寒夜況  
爾宜對眠我當踐子息壤約子當酬我招隱篇

酬鮑雅堂見過韻

江館蕭條坐晚風水紋珍簟思何窮懷人暗覺青楓老臥  
病愁聞晝漏終半枕秋風孤夢淺一天清露小庭空多君  
情似樓頭月清影涼宵許暫同

戊寅

龍潭道中寄金棕亭

輕煙漠漠柳絲絲  
蕩漾扁舟獨去時  
十里寒潮雙岸失  
半江疏雨片帆遲  
傾杯自酌橋南酒  
折簡空裁渭北詩  
悵悵野梅花似雪  
一枝無處寄相思

越河

勝日遲佳侶  
方舟曲水濱  
雪晴山翠薄  
煙暖浪花新  
雨後鷺黃樹  
風前粉白人  
隋隄三十里  
愁絕柳枝春

題南崑圖尋梅圖

冷蕊疏枝雪乍盈  
東風小立不勝情  
何因修到橫斜影  
低映王恭鶴鵲行

折得瑤華付海鷗石闌橋外水西頭  
鞭絲帽影悠揚處我替梅花起暮愁

舊時月色奈愁何搖曳春風入夢多  
合有暗香疏影曲人間怎覓小紅歌

俞耦生小集寓齋

雪意吹花暮景搖晚愁同藉醪醕  
澆玉鑪火燼香絲細銀箭聲殘漏點遙  
花影淡從煙染出酒痕輕借笛吹消  
停杯欲問梅梢月索笑何時更此宵

題羅兩峯古渡汎月圖

隋堤水老煙光淺風柳參差望中遠  
扁舟載月何處來宕漾中流及秋晚  
晚川一帶多蒲蓮疏香襲人輕不眠  
碧瓷

緩酌酌將罄白袷初涼涼未寒寒來倚檠疑聞雨心折秋  
容遽如許小海歌成熟與酬沙禽兩兩時相語

寄雅堂南徐

鴻影汀頭惜乍分木蘭舟上獨銷魂寒潮遠隔西津渡衰  
柳愁看白下門六代風流餘汝在三生情事幾人存何時  
孤館揚州夜涼雨挑鐙對榻論

鏡中雙鬢久成絲況是維摩病起時曲檻孤花成獨笑空  
梁明月解相思登樓爲擬愁心賦見雁先裁寄遠詩爲問  
江乘何日到爲君早晚晒佳期

白菊和江芳國韻

誰種雲根產異材粉廊深處一叢開忽驚香透晶簾押陡

覺寒生藥玉杯零露滿階蛩不語碧天如水雁初來鬢絲  
坐對涼千斛莫更分叢近月栽

題顧仙沂松石問禪圖

金粟從知是後身惠心了義宛如神拈花悟得忘言者又  
向香台覓淨因

小朗詩懷明月在惠休情思碧雲知經行何似松門好靜

對寒山叩本師

用寒山  
子本事

橘洲小社願難忘行腳何時始歇裝高坐清涼方丈室與  
君同證木犀香

雪中和雅雨先生自金山放船至焦山韻

江雲夜凍黯不光金山一點青微茫潮來打鼓放船去紅

旗風掣何飄颺淮舟相與躡飛鞚妙高直上陵天闢支節  
下視萬籟息漸聽風鐸聲銀鐺須臾瓦溝露微白涼煙撲  
面如輕霜映空倏改萬山色祇餘焦嶺含青蒼吾師逸興  
古莫比攜客徑欲乘飛舡開頭乍見轉帆腳轉瞬已到江  
中央五州北固那可辨參差勢與船低昂長年三老盡恍  
惚但隨雲氣爲飛揚少焉雪霽風亦止漸覺空翠霑衣裳  
老僧下山驚客至導隨鐘梵過長廊指點江天正愁絕問  
君何事輕舟航笑談不覺到高頂矯如俊鶻凌風翔雙峯  
可望不可卽玉塵堆積彌高岡紫金西望浩明滅惟見一  
塔攬天長

己卯

偕廬雅雨先生由郟城發輒入都遂次同金棕亭得

詩二十首

中歲無前席頻年託後車馬陵當路盡鳳歷轉春初地介

齊州首風仍楚國餘誰爲傾蓋語斜日一亭虛

郟城道旁有傾蓋亭

遵陸纔三宿羈懷已自深眼平青草短心怯暮雲陰掃舍

家僮力奔槽棧馬心勞筋正堪息聚析莫相侵

客舍仍圓月愁看第二遭白添華髮滿青傍屋山高仙孰

遺丸藥寒偏戀布袍平生間適意今夕獨蕭騷

蘭山期蚤發夜黑路偏多木客宵吟壁山君曉渡河

是日聞見

此如喚人成小隊乞火下層坡卽事堪成慨凌競敢放歌

牢落何年寺青駝尙故叢高碑沈舊雨碎鐸響歸風汲井



剗寒竹炊厨就晚菘夕廊堪縱步馬語莫匆匆  
大汶乘春漲牽舟客共爭眼昏雙岸去心折亂篙撐候館  
知安託與梁苦未成忽思漆洧績惠濟敢言輕

白霧何人嚙濛濛水一涯濕埋林際月寒韞驛邊花酌礪  
深妨癭過鄰淺踏沙晚寒無賴甚啼殺未歸雅

雨歇開山廟眞形忽上騰封中雲自白海上日初升一氣  
東瀛接千秋秘檢承幾時勞玉戲麥隴望頻仍

東省久旱  
二麥待雪

甚殷

七十二泉水灣環到此齊波光翻細雪橋影臥長霓苦霧  
明鼉集饑煙倦鳥栖馬蹄須愛惜留過鵲山西

來日將爲  
厯城下之

遊

沈碑無處訪淚墮故山同醇酒通鄰好輕裘表士風軍行

原有禮臂折豈妨公不解樓船下匆匆効阿童

羊流店謁太傅祠

典午論人物平生得二劉清操推令弟儒術冠齊州道勝

貧何有經明行自修千春宜廟祀名字悵空留

劉智寔弟平原高唐

人晉書有傳今地尚名劉智廟去德州三十里

十二城連郭

德州北舊有十二連城

爲園自一村長河高岸繞破屋

古風存喬木瞻前輩流雲被後昆東樓明欲別舊蹟幾回

捫

宿盧德水先生尊水園園有東樓東澗題欲別東樓去四詩墨蹟壁間尚存

十年辛老子倒屣媿平交棄世還初服爲園負樂郊新詩

窺束筍舊學想分茅遺草空留在誰爲好事鈔

晤田研思學正學正

山蘊先生孫也

青齊行復盡北首更車驅細柳黃雲凍長桑白日枯書聲  
消里曲塔火照城隅向晚淹行李心知僕已痛

景州爲周  
條侯封國

地有藥王廟  
祀長桑君

班班車不歇一道往來通蔓草無新壘青苔有故宮貧民  
自弦管深巷忽簾櫳舊說錢工數擔囊媿久空

河間

春隨塵土去到此意俱降白水秋重疊青天驚一雙女牆

隈曲浦人柳倚平砑好作江南夢牽車閉小窗

赴北  
口

郡符聞夜下云築受降城寇已亡西極軍猶賦北征飛騰

新戰馬老疾舊鄉兵薄暮前驅發蕭蕭易水聲

宿雄縣聞  
徵兵赴伊

犁

易水交深水滔滔走不窮當年誰棄地遺恨在和戎廢壘

高低暗春陽寂寞紅迢迢思奉使攬轡幾人同白溝范成大

大川終日易聖水復今看

水經聖水出上谷孫汝登云卽琉璃河也

楊柳春能

綠鴛鴦晚故寒橋看橫直路撞已繡空闌兀坐成何事隨

人說稗官

橋倚一鐵竿疑爲鎮水物俗稱王彥章刺船所用

河橋方曉月一半已車行氣象成燕市崢嶸接鳳城黃金

何日盡白壁入時輕賴有相知舊將迎見古情

時王蘭泉曹來殷兩

舍人來晤

四月中旬歸自京師感舊抒情得五言長律五十二

韻寄呈劉印于先生姑孰

東第經年別光天此日春河山空北嚮書劍復南詢正始

何寥闊私衷久鬱堙仰懷夫子聖俯遂畢生親昔者羈淮  
甸今方蹈海濱明時看棄擲賤跡只因循何意溝中餌來  
參席上珍倚風開廣路乘氣到青旻前席驚虛辱高懷許  
細論致身惟稷契稽古必周秦講易師齊服談詩憶魯申  
前修悲浩浩假日語諄諄泛水才知海窺天始見辰但知  
心嚮服何敢步逡巡餘事窮高什追遊動浹旬攀花過北  
墅鼓瑟薦嘉賓鳳穴雖皆好謂機夫存子龍門族共臻空羣來  
鮑照謂鮑雅堂驚座得陳遵謂陳組雲淮海人如玉謂俞樵生徐丞遠琅邪  
筆有神謂王夢樓少林聯行眞濟濟侍坐各彬彬白首依歸衺青  
雲志業均齊名幾往哲側目任時人逐日情何極追風走  
忽蹶三秋才勿勿四牡遠駢駢旌旆隨雲豁關山走月輪

望塵如不及執轡了無因書信中原闕聲名

北闕振持衡高太甲聽履上鉤陳健筆凌仙唱和聲叶帝  
鈞雅材輕謝朓碑版陋顏竣大禮陪封禪微文識癸辛  
主恩真莫及公望迴無鄰碧落才仙吏皇華又使臣

天書青瑣拜使者繡衣頻是日奎光爛咸瞻士氣新星軺  
過梓里驛路轉江潯勝地推南服芳華滿近闔湖光褰幔  
湧山翠拂簾勻白紵靈猶在長庚氣未湮江山應得助文  
藻定無倫黃絹憑誰索焦桐自有真采應兼散木搜必到  
潛珉楚彥俱騰卓吳蒙尙隱淪近梁空浩蕩適越竟遭屯  
天漢無羈羽蹄涔有涸鱗興憑遊蟻遣事等戰蛙論犂确  
雙高屣蕭條一幅巾朔風低片片斜歲苦遼遼鬪雀時窮

瓦寒花不向晨桃陰思舊雨蓬轉惜前塵飛夢逾青瑣封  
詩寄白蘋殷勤問雙鯉何日到平津

丹徒舟次

解纜話舟子如聞斷岸摧風高潮欲上江岸雨初來津鼓  
疏還密漁燈閣復開忽聞征雁叫蓬底首仍回

西津雨夜寄阮崙源

候館餘荆榛宵分坐愁寂復此檐際聲冷冷墜階石苔痕  
黯餘滋筠叢泣清滴曖曖薄寒生微微憂思積悵此旅懷  
孤眷爾征期迫昨夢廣陵濤明發瓜洲驛一水阻佳期西  
洲渺難卽空憶折梅人含悽望江北

歸求草堂詩集卷五

江寧 嚴長明 用晦

庚辰

送張龍威還嘉興

草長迷前渡潮來黯去津蒼茫增旅思牢落送歸人病怯  
三年積寒增二月頻河梁分手處愁絕廣陵春

射陽湖晚發

旅宿瀕澄湖停橈見新月舟子利宵行悠悠向空發野水  
旣淪漣寒煙復明滅前期二月程歧路經年別遠夢連鷗  
波遙情寄魚蘊何處菱歌聲江南思愁絕

雅雨先生招集江穎長水榭觀荷分韻得霽字十四



韻

天雨陶佳晨清和氣迢遞飛蓋遊西園通川曠遙裔空水  
既澄鮮朱華信佳麗朝霞水上輕夕霧煙中翳覽物餘奢  
忱雲林倏虧蔽梢梢雨氣濛濛漸波紋細遊鯈共灑潏鳴  
鷗互騰逝撫化良易遷宵中復開霽輕風動林表華月生  
煙際清冷散水木光景紛溶滴疊鼓映中流華燈耀芳砌  
嘉樂使君賢懽悞眾心契終讌不知疲清風孰云繼

寄題袁簡齋太史隨園四首

靜憶蘭成宅臨江十畝開雲山新藻繪煙雨舊樓臺大隱  
名終遂鴻都賦莫裁遙知春桂發費盡小山才  
陸艇移新雨潘輿奉晚晴道心春水活世事柳花輕書畫

西廊庑尊羹曲机橫桃源無客到聊與白鷗盟

青溪流不住雙槳到門時小艇迎桃葉閒情付竹枝風懷  
煙柳在愁緒早鶯知若問南朝事前身是總持

憶昨叨良會金堂坐夕曛燈光全在水花氣欲成雲綠酒  
湛芳罍新詩滿練裙至今絲竹韻猶向夢中聞

送余汝舟歸蘭陵

蟬聲迢遞別西林棹觸文通一夜心花月中宵憑接席香  
燈小社感題襟關心別路寒潮廣極目離亭暮雨深縱使  
秋來相近地也須芳訊達繁欽

雅雨先生出德州羅氏欽瞻家釀飲客杭堇浦蔣秋  
徑江賓谷陳授衣各賦羅酒歌余亦繼作

中山白醪茶蘼馨鄴湖舊醪玻璃成郎官西市事高格當  
杯一笑徒虛名平原羅氏古康狄承槽抱甕非恆情瑤英  
下擷積玉圃露華高挹黃金莖漉和齊量出新意使我灌  
飫同饑僮凝香燕寢況清暇冰壺雪梳交縱橫宛如仙子  
值姑射著膚雪玉菁而瑩流精轉盼動空碧含辭未吐先  
傾城人間意計那能到毋迺參宿來星精共犁天田播芳  
秬別寄玉井歸行縈瑤思瓊想出蘇液台女上日娛清朋  
天工下界不可負當筵自欲傾千觥風雅況逢四海伯下  
風欲拜誰齊盟青眼高歌對吾子直令痛飲俱忘形氣酣  
奮袂欲起舞耳邊習習清風生玉山自倒冠幘墮臥聽驟  
雨如盆傾

將往姑蘇道中寄耦生

芳席愁中已倦逢客程孤往況匆匆舟行碧浪重湖外人在黃昏細雨中堤柳愛逢春色住落花無奈水流東不知何日紅橋路解襖還能一笑同

初入姑孰西園

一徑入修竹隔溪橫翠微山光明斷靄林影淡輕暉蛺蝶作團起落花相背飛春風無舊識漸覺故園非

晚步南郊至光孝禪寺

蒼蒼霧連空月出數峯晚褰裳涉迴溪人影上秋阪披煙信崎嶇緣源任回轉招提何處幽杳藹前峯辨塔火明虛林山鐘遞遙巘境往情已遷隨緣獲深遣聊同香積僧一

就中林飯

由光孝朝適青山

夢覺聞清鐘僧寮見天曙理策步松門林光導微路宿露  
晨未晞荒煙澹猶遠高下隨坡陀沙洲信回互前山紛已  
重環谿緬非故空聞澗草芳時聽岩泉注幽棕何處尋清  
梵中峯度

登采石太白樓

穹樓如翼俯通津有客登臨發興新明月豈忘天寶事清  
江曾照錦袍人空牆四映青山老

樓下有蕭雲從畫壁

隔岸遙憐宰

木春牘欲招魂扶大雅古風蕭瑟竟誰陳

含山張氏榕園和印于先生韻

落葉紅依萬樹霜  
鞭絲空趁野雲忙  
誰家占盡閒煙水  
九曲廊通十畝塘

橋痕瀉月鱗鱗白  
石氣沈煙面面青  
領取江城如畫處  
夕陽還上水西亭

虛閣籠雲向曉開  
鉤簾山翠撲衣來  
倚風尙恐吟清冷  
更遣紅梨繞屋栽

松花露滴盈尊酒  
竹葉風翻滿架書  
底事又隨征雁去  
月寒山翠渺愁余

### 送丁日峯之楚

踪跡天涯快合并  
無端迢遞送君行  
客中尙喜同今夕  
雁去愁聞第一聲  
孤嶽寒光催雪早  
大江秋色與雲平  
漢陰

何日偕真隱目斷湘煙萬古情

鍾離九日登長安眺矚

時代有變易客愁無古今指景況佳節能不懷登臨駕言  
適西郊崇阜堪高尋淩風入叢薄披煙出寒林遙看日落  
處秋風來蕭森山川鬱無語萬里徒陰陰縱觀聊極目撫  
志餘奢忱去者亦已息來者將誰任悠悠付天地孤嘯還  
高岑

寄姜若彤

海鶴誰爲侶冥鴻若可招抗懷淩古昔生計逐漁樵將隱  
誰先路非材得後凋何時一樽酒翦燭伴無聊

吾友多能篆如君亦中書長箋遵叔重破體陋黃初貞石

規雄健良金辨魯魚冰斯更千載能事有誰如  
哀樂中年集馳驅晚歲長浮生空碌碌盛日去堂堂終古  
幽人吉尊生萬累忘一椽何日定安隱白雲鄉

合肥包孝肅公祠

雙闕村前落日紅清風猶在絳帷空姓名能使兒童識關  
節難教戚里通三疏上陳思往日專祠孤峙有西風流傳  
稗史荒唐甚角鼓閒評任野翁

柘皋道中

莽莽秋郊路匆匆賦別離山低雲出早天遠雁歸遲關塞  
經年隔星霜兩鬢知客程君莫問春草是前期

辛巳



盱眙固鎮阻雨和印于先生韻

衣上臨濠雨縱橫到楚西衝風遲過雁急柝悞村鷄水瀉  
千江直雲屯萬馬齊盤盤三百里何異陟青泥

四壁荆榛滿鷄栖愴別思孤生情易感空館夜多疑鼓角  
中宵暗星霜兩鬢知今朝鄉夢穩燈影漸離離

天意催明發清光透短扉村農喧使騎山鳥怪儒衣浩蕩  
慚知己提攜到細微文游詩滿篋字字與珠璣

年少歌行役

時樸夫赴都  
存子客鍾離

相思一愴予淮南新病劇薊北

好音踈江海遲歸夢乾坤任瑟居鄴中難合并慚愧說應

徐

萍梗無休日隨波復遠行

時余將復  
往廣陵

風煙歧路重去住一

身輕風義憐今日艱難愧此生顧深臨別語真見古人情

舊雨關心甚

時蕺園楚筠耦生俱在揚州

何時更盍簪浮雲散天末芳

草歇江南去矣看春雁歸與顧曉驂早安方丈室結愛與

同龕

卑濕江陽地炎天沉鬱烝心如倦飛鵠身是過堂僧吾道  
行難卜家山隱未能煩憂將暮雨一夜住何曾

由淮河登舟至洪澤大風有作

陸行倦登陟喚渡逢輕舸九岡十八窪

地名

宛轉隨雙橈須

臾出空闊騁望何滔滔衝風復加厲萬里橫相遭騰傾絕  
大地兀怒掀青霄雙丸向空擲萬怪紛高跳將毋河伯使  
期我遊螭坳我非李謫仙下筆驅波濤安能乘長鯨貝闕

恣遊遨揮手謝之去急轉船頭招回頭認歸岸西見浮山  
高殷勤治牲璧玉座陳杯筴占辭向古屋四壁仍動搖

晚赴宿州

落日下層邱蒼蒼遠樹浮人煙寒背郭水氣欲生秋歲月  
看遲暮關河枉滯留前村多魯酒爭慰別鄉愁

過符離張魏公喪師處

曾售微公史筆欺戰場親歷轉增悲

地名百戰處

金戈半夜同

時遁玉帳酣眠竟不知頗牧空教懷爾日韓彭誰遣戮當  
時壽春去此無多路曾破苻秦百萬師

雅堂欲返南徐書此誌別

一夜渡淮水天涯今已秋青楓正搖落況君動行舟行舟

去安適東望滄波流秋聲亂紅樹海色連沙洲他鄉此爲  
別一笑何時酬嗟余寡兄弟同氣惟君求自從間芳躡半  
載心幽悠淮南幸相見桂樹欣攀留寧知歲方晏孤影終  
難儔舊家秦淮水遙對臨江樓臨江夜潮落直到南徐州  
願君日垂釣恐有魚書投

姑溪使院園亭晚坐

亭林看晚霽清氣滿空虛勝日各乘興息機還著書秋苔  
連雨淨高柳出風疎人事無從與寥寥此靜居

鏡巖歌爲王景言作

淞西處州仙都山道書所稱祈仙洞天也上有洞空明如  
鏡名曰鏡巖唐時黃老徒周景復居焉八十年不火食日

焚降眞香誦靈寶度人經而已東牟段公柯爲州日嘗梯  
巖以造之皮日休至吳吟想其道無由以覩因題一詩以  
寄詩載松陵集中梁溪王君游諷覽篇章慨焉興慕屬張  
主政默岑舐筆爲圖並索同志題句余亦廁焉

吾聞仙都山高高入天石梁萬丈空雲煙就中鏡巖更清

闕芙蓉下照光澄鮮

芙蓉鏡名

我昔遊仙夢於越親見雲邊鏡

光澈湛然秋水不可磨化作中天一輪月月輪照我影送  
我淩丹梯鹿巾仙翁在何許石壇瑤草空萋萋手持葛陂  
杖口詠松陵詩粲然逢玉女再拜前致辭昨日西風來吹  
我雙鬢絲秋霜滿鏡不可掃問君負局來何遲千齡小別  
忽焉覺至今夢魂空然疑今之斯圖毋乃是杜試爲敲雲

問名氏九龍山人王子喬興來妙得滄洲趣  
筆底傳來冰雪胸篋中貯得煙霞氣君不見廬山秀出南斗旁石鏡照水生清光又不見大荒之西日林國能以方瓊致魂魄僧繇妙手兼擅之洞天遠近分毫釐羣仙抗手招已久向平婚嫁終何時禪榻披圖臥江野青霜坐對絲盈把我亦天都舊散仙今何爲是栖栖者

送徐烝遠歸興化

東風無力挽行車才賦同心又索居春思正縈中酒後離襟偏在落花初關心樹色前溪外極目帆開落照餘此去有書須寄取天涯一慰病相如

潁川雜詩

梨花泛白柳垂青遙映湖光滿郡城休向蘭舟怨離別故鄉無此好清明

回首松喬舊日祠濁清何苦辨澠淄一杯祇酹牛醫墓愛

汝汪汪千頃陂

松喬祠在西湖上祀漢陳蕃郭憲范滂三君

文章事業兩銷沈太守風流孰嗣音見說城東踏青好聚星堂上草痕深

諸生久廢三條燭女子能灣兩石弓至竟憑誰訓詩禮南岡高處憶坡公

用晦

詩

新詩擅雅材仲初

王

才調敵明瓊沈雄獨愛猗扞

子解道青山萬馬來

汝陰去後復江都宦跡居然擬大蘇留得去思堂畔月清

光夜夜滿西湖

謂雅雨先生

井中玉版悵彫殘  
襖帖偏旁孰與看  
袖得孟皇書一紙  
那

須真本乞河南

謂梁文山

明道東歸似有期  
笛吹一曲夜何其  
逡巡聽偏涼州徹  
正是潮平月落時

是日學署觀劇卽別

### 皖江午日寄懷耦生

閒庭獨坐午風薰  
魚鱗沈沈枕簟紋  
蒲葉嫩搖屏自綠  
榴花濃帶酒初醺  
廬江北去無芳草  
皖水東迴有暮雲  
手把離騷空太息  
不堪重讀望夫君

### 懷寧舟中

不解言愁始欲愁  
問心如雨黯孤舟  
二郎水曲難通浦  
百



子山高易得秋故國河魚聞大上中洲陂雁集方稠推蓬  
欲共江流語滾滾何時得少休

余忠宣公祠

赤手難遮水欲東艱難百戰計終窮身經危處國將破仁  
到成時室已空敢以中原限人物公先世爲唐元人肯隨殘局論  
英雄隔江便是黃公墓遺恨斜陽一例同

江陰道院坐雨和鮑丈步江韻

仙院重門靜不扃晚來同坐雨冥冥高梧照水一方白翠  
竹和煙滿屋青獨成遠聞更乍歇明鐙靜對酒初醒瀟瀟  
縱少吳孃曲賴有黃門好句聽

送許七敬思梁谿四首

習家池館夜曾同絲竹當場亂曉鐘今日天涯兩蓬鬢楚  
王筵上獨相逢

殘夢關心豈易論水晶簾外又黃昏何因化作玲瓏月清  
照羅衣舊酒痕

三生情事百年身小住東頭已浹旬慚媿山南繁主簿定  
情祇解一雙銀

東東車畔聲猶在定定天涯去不還解識送君腸斷處九  
龍山是九疑山

壬午

偕陸璞堂過宏濟寺

共攜笠屐訪深公導引虛闌俯碧叢千佛經聲天下上六

朝帆影水西東梅花的皪初辭雨燕勢迴翔故倚風坐待  
離宮開晚照松陰三十六間紅

時以皇上三幸江浙於寺北恭建行宮

二月十四日迎

駕揚州北門高橋

敢將詞賦擬鄒枚英蕩聊充歲貢來花外雲霞

仙仗列鏡中金翠

御船開

龍顏有喜天同霽羽衛無聲水似洞不用更騎遶海鶴虹

橋西去是蓬萊

行宮在鎮淮門外

三月二十六日

召試鍾山書院

衍波曾賦曉來寒整甲重來興未闌青瑣闥開齊授簡自  
鳴鐘動早傳殮碧資點筆茶初熟黃帕分題墨未乾來日  
天顏知喜未向前已荷近臣看

御試江漢朝宗詩

通瀆遵侯度春朝復夏宗汶源分正脉嶓冢合遙蹤巨浪  
排雲霧驚濤撼鼓鐘雙潢天漢落一紙海門逢協氣吳朝  
匯揚靈楚蓋重望洋知浩瀚歸壑想包容宛載舟航集還  
同玉帛供乘流瞻  
聖化環海頌時雍

二十八日蒙

恩特賜舉人授爲內閣中書感賦二律

探榜心知願不違傳來猶恐姓名非已教刷羽凌青桂更  
許含香近紫微斷木無聲終見度冥鴻有翼敢辭飛相看  
更喜吾軍張去王後廬前莫漫譏

特達科名喜最優休將甲乙混詞頭許身敢以他途進待  
賈終邀側席求下第始從庚午歲授詩猶記丙寅秋余年十六始爲有韻之文青衫前度愁無限逆作憑軒涕泗流

二十九日引

見天寧寺行宮

初見桃都照影纔鵷行雙引

法宮開

金輿天上回翔度

黃織西清婀娜來無限春光歸上界真成仙聚在丹台是日

同人引見

馬蹄歸路清光滿帶得三霄顚氣迴

四月初六以迎

鑾賦入選蒙

恩賜內紉一端恭述一律

搗辭豈有三縑直邀貺欣逢束紵披碎錦遙從裏湖濯機

有乾隆二十六年杭州織造臣某進字

團花新向上林移敢期華袞他時補

竊喜絲倫閣下宜回首江湖十年事綈袍祇荷友朋私

送雅雨先生 予告歸德州

卅載賢勞擁傳行敢因多病乞歸身同朝久識先生老聖  
代能全達者名臘雪漸看侵短鬢官梅猶愛點雙旌留人

一曲旗亭讌便是陽關意外聲

先生著有旗亭記樂府

萬卷書隨一葉身扁舟如翼薄通津詩篇盡解賢疏廣父  
老終思借寇恂一代河渠書欲就萬家鹽筴利維均丹青  
會繼三賢躅禊飲誰酬隔歲春

先生曾以程氏篠園爲三賢祠祀歐蘇兩文忠公以

王文簡  
配食

清門一曲俯長河尊水園開繞薜蘿春雨春風新長養某  
邱某水舊經過著書好比郊居賦占夢全消宦海波領取  
商山間歲月青青枝上夕陽多

歸求草堂詩集卷六

江寧 嚴長明 用晦

癸未

上元前二日夜值內閣

拋將白晝養踈慵更直翻教夜在公  
大好燈光都隔巷半明月色故窺櫺  
冷杯揮去愁難繼溫卷攜來檢易終  
猶恐良辰孤負盡強聽春鼓繚垣東

喜戴園到京作

經冬未奉尺書遺知是征軺到有期  
旅囊垂如相別日春

光間似去年時

去歲正月上旬與戴園自揚州買舟赴袁江

何因賃舍比鄰住

便擬披經與共治人海茫茫休悵望故交相倚卽津涯



內閣墀下椿樹一株垂蔭直廬杉亭前輩命賦七言

古詩

宣城紅藥不可見香山紫薇今已無誰歎手植大生木軀  
幹正直枝扶踈我時寓直票籤處西窗近附圓陰敷人間  
風日不復到座中八九皆吾徒義冠大坐述舊事要令神  
往昌辰初明明在朝穆在列均霜揆日司天樞當年樹人  
等樹木長此佳植非區區作真要使同枯柏立塗不願隨  
薪樗維楨會待八千歲庭花苑柳皆須與禮官况值拾材  
日就中尤見精誠孚春風吉語報無爽海棠信有雙靈雛  
歲值會試春首卽有鵲巢其上中書舍人進士及第者有  
一人則結一巢陳省齋前輩云自乾隆丙辰至辛巳已十  
二科矣親記驗之無或爽者 余時傾耳獨笑粲是猶索駿仍按圖育材

自係宰相事置身奈等支離疏居高藉爾十畝蔭合班但  
願來于于大家談笑了公事有暇更探文淵書

出西華門過金鼈玉堞橋口占四首

宛紅千尺帶明霞下瞰宮鴛颺水涯悵悵向來清景失軟  
紅塵祇踏東華

閣道橫空瓦欲流漫將太液比滄洲隄邊纔碧如人柳已  
解垂垂蓋御舟

蓮葉初抽荇葉遲車聲人影亂清漪羣鷗生小無機警飛  
向橋關立少時

瓊華一朵好煙鬟咫尺空教賦別難恰似曲江逢麗質停  
車未許近前看

將入禮闈移寓內城呂公祠

入洛誰相識荒祠售一廛閉門廣招隱欹枕小遊仙凡骨

何因換丹梯似可緣祇因期子晉長嘯絳台邊

觀象台在祠東南王

少林同年

寓其側

泌水無由訪

祠西舊有楊氏泌園

青春已漸過晚花孤自媚凡鳥半

能歌酒不增狂興書偏引睡魔日來耽畫寢那計夢云何

燕都遊覽志呂公祠乞夢有驗歲大比士子爭往焉

吳白華前輩趙損之同年招辛未丁丑

召試前輩壬午同年集大雲寺座間並有訂文之約共賦

五言分得十藥成五百字

長安新雨餘地淨天宇廓品彙咸昭蘇人心亦忻樂好事

逢二遊長牋走環郭憑仗五尺童料理三日諾小會羅衣

冠嘉招集京洛並發銅街連共駐玉蹄削輩行大小并科

名先後合南遊沂方舟北征計維駱謂乞假南還暨扈從木蘭各前輩聚

奎星已羸登瀛數少約是日會者十七人連襪如屏風高座肖華

嶠堂上凝清光檻外森碧落角簾陳烏皮膽瓶浸朱萼意

緒抽色絲詞鋒淬廉錫發難東馬慚紀事南狐卻官紙月

乍窺子墨煙欲著狂揮宣城毫渴把舒州杓禮已捐煩苛

醉或恣諧謔同遊胥近尋我懷倏遠薄事憶辛未初年汜

壬午昨數典稽唐風降策祀南霍布澤萬族欣掄材

一心度皇哉揚馬儔蔚然龍虎躍平地生長風彌天縱飛

躋含香對紫薇矯翼傳支鵲丁簾揭朱筠辛檻賦紅藥祕

冊南薰呈靈圖武英拓酌大庖名泉啟黃封甘酪新恩玉  
有華舊事金在橐閱歲始一周行年若交絡隨肩賦長楊  
得路陳五柞或爲截雲鷹或爲出風鶴或爲清切司金馬  
肆殷礪或爲蘊藉郎天星共融爚留者旣雍容去者復寬  
綽綽綽碧油幢冉冉青絲紉具區天隨帆小華容成屬鶴  
侶前輩將回吳吳因知西南占未易再三索疇昔慕古初  
二匏前輩將回歛稱傳必有托絢簡草鳳池雕章集綸閣矧茲制舉名有詔  
帝庸作唐選舉志取士之科秀才以下凡十二大科逾甲  
宋史葉祖洽傳太宗歲設大科卽唐時制科也觀邵氏  
乙聞見錄謂富鄭公初遊場屋穆伯長謂之曰進士不足  
以盡子之才當以小試異宏博唐人所云博學宏詞特以  
大科名世語可證  
聖以後章惇改制專取詞賦復以唐之試選人者所當任  
名之王應麟詞學指南序謂宋制卽唐制非也

流傳一爲起衰弱文苑備春秋詞林敵海錯豈惟錄雲萍  
聊爾事丹雘翳余質樗散卅載置林壑方心媿雕龍拙手  
笑蹲鴟猥投漆與膠麗比笙和簫題襟漢上如聯唱浙東  
若小錄序同班光誦緬前獲援毫申此詞高會永無忤

結交行贈龔上舍鑒成和蔣心餘前輩韻並送其歸

### 宜興

少年結交閩里間聯裾有若屏風然意氣自若追古歡中  
歲腳下一萬里南絕濤江北河水所至之間陰相士眼中  
之人何有哉紛紛輕薄隨塵埃越若生者從何來不知其  
人視其友翰林朱君竹君編修於我厚昨者誦生不容口今觀  
令質真吾師片辭未接情先移交手欲贈青松枝胡爲欲

隔經年面懸水千波帆六扇直送歸人去陽羨陽羨山遙  
水更分贈君不惜離歌頻他時莫忘作歌人

偶閱厲太鴻樊榭山房集有讀王定保撫言戲廣其  
意得八首

千手詩輕萬戶侯張公子合冠杭州拾材得覲東坡老翻  
遣徐凝在上頭

孟浩然身更不疑傳來秋卷總成嗤眼空祇有蘇和仲絕  
倒開元瀑布詩

阿孩兩箇誠娟好東絹千馱詎等閒顧語紛紛白袍子今  
年且看華山還

還往紛紛總喫虛貴人多忘古今如賣漿環堵尋常事齒

冷王冷然一書

懷書踏筆計全疏公道何時著令譽忍見習之知已賦梁公沒已五年餘

獻啟簾前苦用心白衣濫竄古猶今東歸並少西園在此事卻輸溫八吟

三十浮名未足多長春叨占好登科年年模樣休輕悔錦襖原難上著莎

詔開制舉重如何品目休從甲乙譌心折仁和杭老子撫言別自記詞科

杭堇浦先生著有詞科撫言記丙辰召試宏博事

葡萄聯句

蟠根蔭秋繁

程蕺園晉芳

磊實壓架闊

趙璞函文哲

匝步



停圓陰

阮吾山蔡生

釘坐觸微馥

董東亭湖

低謝桑梯緣

吳白華省欽

斜宜棗竿掇

嚴道甫長明

葉翦青霞裾

陸耳

山錫熊

粉褪紫葺褐

戴園

花鬚卸錦綳

璞面

菽乳逗羅袂

吾山

承盤珠顆纍

東亭

入手彈丸脫

白華

落蒂僅扶寸

道

甫

函粟不盈撮

耳山

辛含舒眉攢

戴園

甘吮利齒齧

璞面

嘗新枯腸腴

吾山

道古滯臆豁

東亭

漢厯推太初

白華

唐

封拓且末

道甫

種隨苜蓿來

耳山

名先荔茭達

戴園

露湛

金莖寒

璞面

漿蠲玉魚瘍

吾山

宮榼柑並傳

東亭

貢包橘

應奪

白華

十種蔓雞田

道甫

百株纏虎闥

耳山

離離碧琅

玕

戴園

粒粒紅韎裼

璞面

白訥乾雪霏

吾山

黑疑淡墨抹

東亭

鶯機翻樣奇

白華

鶯絹折枝活

道甫

麝眠香玲瓏

耳

山蜂鬪影轆轤蕺園絡野延荳棚璞函擔市堆竹筴吾山

移栽知誰何東亭攀摘問月曷白華牽連春植援道甫防

護冬擁塌耳山銅瓶注濃泔蕺園金剪薙叢茝璞函穿帷

月惺忪吾山裂帛風綵縹東亭蕭梢彩鸞翔白華天嬌少

龍拔道甫薄游眯軟塵耳山素食厭粗粕蕺園櫻虛四月

厨璞函蔬乞千家鉢吾山眼明詫駢羅東亭指動快擲將

白華黃欺皺栗蒸道甫綠勝浮瓜割耳山蘋婆枕卻懸蕺園

蕺園芋魁爐免撥璞函分無涼州除吾山心憶漢水潑東亭

巾角翠雨淋白華榨頭紺雲撈道甫逾蘭生色清耳山擬

桑落性辣蕺園醉鄉從浮璞函釀法早拈括吾山興同

麴車逢東亭事異屠門咀白華試佐細君貽道甫亦慰侍

臣渴耳山

寄懷徐念祖四首

四海論風雅如公復幾人  
鴻名傾沈范卓行蠲陳荀白首  
思前輩青雲篤後塵遙憐詩滿篋一一露天眞

蓬山曾遠謫孤邑就東封  
作尉嗟梅福當官重李邕三年

論宦海一笑浣塵容揮手爰山去  
行歌事老農念祖令蒙陰三載以

公事被議罷歸

憶昔論交日平津共夕昏

甲戌乙亥兩歲與念祖同客謝山先生賓館

古人如

可作知已賴公存春水南陽路秋風白下門  
幾回吟卷裏

心跡與重論

相別猶前度相思已伴年  
關心遲暮日搔首次寥天楚樹

飛煙外吳帆落照前蕭蕭黃歇浦何日共沿緣

念祖札至云近客李

鶴峯先生幕時方按試松江故云

六月中旬移宣武門內與畢秋帆前輩同寓談讌之餘偶有感興漫賦四律

萬人海裏一身浮何意回旋聚一漚置榻愧煩開歲約授

經喜與夙心投有甥難得何無忌生子當如孫仲謀

沈敬亭先

生曾孫夢龍秋帆前輩甥也暨子椿並從受學自哂年來遊已倦此間便欲署宜

休

爲住平泉憶晉公今人中有古人風三春桃李情無限十

載江湖轍竟窮

所居爲裘漫士侍郎第己卯歲侍郎典試江南以余未得領薦爲恨曾屬簡齋致語

時余賦遠遊率未通一款也

知己何時真北面替人猶喜見南豐心期

爾許無由荅自笑依然舊阿蒙

西屋東頭好寄居隨波聊復任舟虛門無近市希逢客架  
有平生未見書抗志妄思千載後浪遊終悔十年初豈期  
君亦同迂拙未肯名山換石渠

中隱王城在昔云此間終有影形分自陪燕話清于雪頓  
覺羈心亂若雲客舍并州聊屬我買田陽羨尙遲君何時  
初服真成返共築山堂號耦耘

九月二十日補方畧館纂修作

藥院春風半載移巢痕初換舊棲枝朝班幸免昏晨直郎  
位原於著作宜胥脫不須稽往事汗青遙計正無期三餘  
退食空多暇媿少高文繼左思

晉左思爲三都賦自以所  
見不博求爲祕書郎中

秋帆前輩移居宣武門外宅爲汪荇洲千波兩先生  
故第庭後有得石軒查梅餘先生曾賦七言長句偶

次其韻並索諸同人賦

吳儂家鄰范少伯生小看山得山癖無端揖卻太湖公

然來作金門客景光把玩石火如屈指春秋十三易

秋帆前輩

自壬申歲入都今十三載

豈無邱壑置胸中奈此塵緣巧相兀眼明何

處小飛來躡斗量金不成惜急分修竹遞新泉淨滌赭膚

露青脈丹穴窺來入十餘晶光透起三千尺潏作孤雲似

有聲挑開巨浪疑成脊得非逸獸狎中黃不然落宿遺甘

石好從木末啟飛窗更向墀心立高柵橫堪成嶺側成峯

方者可珪圓可璧詎眞愚叟會移山大抵誠求多滿獲摩

抄行復想當年短耙長鑿幾疏剔構此人間小有天管窺

漫道青冥窄題名況有懷清翁似雪新繚手親襃軒額爲湯西厓

侍郎題風流惜未賦新詩讓取他山奪吟席嗟君平生托好

在三益如石論交思久積寓物常時總不留希心到此翻

爲役往來況有次山元退谷其昕夕相看何必問歸

吳蘭圃春風左徒宅王鳳洲弇園在太倉歸吳岡之西前輩南中宅子卽其故址也左徒舊宅

猶蘭圃陳臥子題弇園句

九日雨中顧北墅前輩招集寓齋和韻

良辰折柬共清卮晴固欣然雨亦宜人是冷官來較早花  
於佳種放偏遲煎茶興欲暮僧格落葉聲如續楚詞恣寫  
小詩酬暮景風燈任滿白沙埤

偕允懷叔遊增壽報國兩寺

前身定孤僧見寺輒欲往矧茲先期招復值秋日爽連裾  
入三門瘁葉踏莽蒼聞聲犬隔離吠客時一兩道人疲津  
梁肅客意殊強彈指開經堂丹碧孰所昉前遊記摧頽茲  
來倏晃朗迺知象教力興廢遞消長我來無所得定步乏  
餘想但惜雙槐高出戶首頻仰

慈仁寺雙松掌錄夙所識偶因過鄰庵此間迺一至入門

祇秋蔬青綠藉滿地信步訪毘盧高閣亦已廢

寺中舊有  
毘盧閣乾

隆二十一  
年改爲殿

小師多殷勤意在佛錢施導引觀祕甃變相時

出示予意懶拜膜但叩石幢字金元迹已荒惟贖巨碑二

其一全慶年摩挲有餘思讀罷僧亦還寂寞兩無事



移住聽雨樓北小軒作

嬾事吟階滴移牀就北軒石根欹作路樹影直當門掃徑  
誰經過攤書祇默存間來諸境寂幽鳥也成喧

十月二日晚得雅堂札

昨夜西堂雨淒迴旅雁聲今宵北窗月清鑒故人情別鶴  
新圖夢寒花舊約盟會期知正遠空有兩愁并

題秋帆前輩倚竹圖

紅梨別館校書慵習習涼風瑣院東又占幽人林下趣滿  
堂煙雨一溪風

亮節虛心迥出羣蕭梢清帶出山雲柯亭劉井風流歇合  
有斯人對此君

和吳鑑南移居韻

一枝揀得勝長林高寄於焉事冥沈地迴漫愁輸井稅天

寒宜醪暖房金新開小圃從誰學舊有層軒記獨吟宅舊爲高

蕙圃前輩寓獨吟其集名也漫道此間同傳舍故居久已失山陰

一桁西山窈窕窗中面面與心期家無長物安排易案

有叢書放頓遲宋拓賺來須穩護鑑南于諸州嶼前輩處假得太觀太清樓帖

唐花買得倩誰司就中一一堪圖畫盡就應還索小詩

薄宦偏宜自在身萍蓬寄跡豈無因南陔養志依晨夕東

觀摘文尙雅馴鑑南時方集錄鄉先輩著述爲會稽獻徵錄亥日盤蔬喧近市

丁簾燈火暗親人他鄉歲事行看盡輸與安便斗室春

十二月十一日葢園招吳白華曹來殷兩前輩趙璞

函陸耳山兩同年集寓齋觀盆中芍藥聯句得三十  
二韻

老屋冬林外

白華

衝寒駐曉驂管辰才臘八

習庵

花信倏

春三綽約姿新獲

道甫

將離字舊諳翠根移市北

耳山

紅

影占窗南薄日籠虛牖

璞函

沈煙護小龕簾深波不卷

戴

園

壺淺凍猶涵滑几光浮檻

白華

圓資色奪嵐來遲何掩

冉

習庵

放早大差參體弱風難舉

道甫

苞輕雪易含近人

沾宿粉

耳山

隔座觸清醅似帶腰還鎖

璞函

如杯尾乍婪

冰華承瀼瀼

戴園

石髮亞鬢鬢禁冷欺梅瘦

白華

凝暄倚

杏慙尊前宜一酌

習庵

鏡裏好雙簪條谷懷仙種

道甫

豐

台紀客談地偏村叟據

耳山

術巧圃師就迤邐塍連馬

璞

函 暝瞰室閉蠶遮應糊白繭戴園 視每劈青箇伏坎泥重

裏白華 乘離火半黏潛虛機未引習庵 鑿空氣先函百沸

湯頭緊道甫 三和土脈甘喚來魂竟返耳山 扶起睡初醒

翹朶排宮紫璞函 傾趺褰塞籃依稀聞篤耨戴園 頃刻見

優曇製合駟筩並白華 功分羯鼓堪價高輪甲族習庵 遞

急走丁男嘉賞遲瑤砌道甫 珍貽遍彩柑力翻愁地棄耳

山 功直訥天貪是物希爲貴璞函 他時殿未慙秉藺逢襖

節戴園 終擬郭西探白華